

## SAN PABLO KARTA FXILEMON JÏ

### *Pablo' Fxilemona's fxi'jni*

<sup>1</sup> Adxa' Jesukristo jxkaahni yuwe ewsa's pta'sxpa'gaçxáa preesu ũsthu, nawa naa karta's fxi'jaçthu yakhtē'j Timoteo yakh, kwe'sx yakh mjïisa Fxilemon idxa's weçxana.

<sup>2</sup> Vxite' kwe'sx npe'sx Apia vxite' yakhtē'j Arkipo kwe'sx yakh mjïisa vxite' iidx yatte pkhaakhesawe'sx txāawe'sxtxi weçxanath fxi'ja'.

<sup>3</sup> Dxus kwe'sx Tata vxite' kwe'sxtxi jxpe'jsa Jesukristo txāawe'sx pu'çxni wēt mfxi'ze.

### *Fxilemona' Kristo's ũusuh jxuka yajkxna vx-itetxwa peeygãani*

<sup>4</sup> Bagaçxtewa Dxus yakh puutx we'we iisath idxa's yajkxna Dxusa's weçxá'.

<sup>5</sup> Txā'wē Jesukristo's yuuçxáa yajkxna yakhtē'jwe'sx jxukaysatxku peeygãhna fxi'ze' jïni's jiyuçxath txā'wē weçxá'.

<sup>6</sup> Idx txā'wē Dxus yakh fxi'zepa'ga vxitewa Dxusa's jxpa'gasa ũsta' txāawe'sxwa Kristo Jesus kïhtewa jxuka pu'çxni's ew jiyukahnthu Dxusa's neewe'we'.

<sup>7</sup> Adxa's iiméh wala weçx weçxa ũusuthek yakhtē'j iidx peeygãani's jiyute', txāa pa'gatey txā'wē iidx pa'gaçxáa vxitewa txāawe'sx ũuste wēt-sa's jxpa'gatx naa pa'ga.

*Pablo Fxilemona's neewe'weni Onesimo's ewçxáa jxpa'gakahn*

<sup>8</sup> Adxa' Kristo kaahnisath na' idxa's juuna' jxkaajxa' ãjawa'jsath.

<sup>9</sup> Nawa idx txã'wẽ ewsate jiiçxa', juuna' we'wemée peeygãhnaçxáath we'we', adxa' Kristo Jesusna selpiipa'ga preesu ũsthu thẽ'khwe yã'jsa.

<sup>10</sup> Txãasath idxa's pu'çx jxthãasu' Onesimo's ewçxáa yũuna. Txã'sa' adx nçxi'k na'wẽsath Dxus jii knay ay karcelte ũsçxawa.

<sup>11</sup> Nyafxíi yu' idxna selpisáa Onesimo' seelpimeesak yuu. Nawa ãçxha' wala seelpisa' adx yakh vxite' idx yakhwa.

<sup>12</sup> Txã'sna iidx tasxte ki' kajaçthu aç'a miipa'ga adx yuu kxtee pa'jaç na'wẽ.

<sup>13</sup> Adxa' Dxus yuwe's pta'sxpa'ga ay karcelte ũsthu aç'a adxna pi'kxna ũswa'jsa Onesimo's kaahmeewaç wejx ewna, idxa' adx yakh pi'kxna ũsya' ãja'çmeeg aç'a Onesimo ũskahn.

<sup>14</sup> Nawa txã'wẽ yũu wẽemeeth, idxna kaa-jiyu'jmey yu', kxah idx adxna pu'çx wẽeçxa' pu'çxhine'ga Onesimo's kaapi'ki'jna. Nawa idxa's txã'wẽ myũu jĩna yu' jxthãasuçmeeth.

<sup>15</sup> Onesimo' iidx tasxu maz en yu' txuteene', naajũyã'ja' peena yu' bagaçxte yuhwa txu-teeya'mée.

<sup>16</sup> Nawa ãçxha' selpiisáa na'wẽmée, wejxwa selpiisaate jxthaakwe yakthẽ'j peeygãanisa na'wẽ ew idx jxpe'khan ne' txã'wẽ yũu. Adxa' Onesimo's wala peeygãja'th, aç'a idxa' wejx jxthaakwe peeygãawa'j ji'phgu, Onesimo' iidx

jxpe'jnisak yu' nawa ãçxha' txã'wẽçxáamée, iidx yakhthẽ'ja' Kristo's jiisapa'ga.

<sup>17</sup> Idxa' adxa's namiku na'wẽ dxih yaakiççxa', Onesimo's miipa'ga, adx pa'jwaç ma'wẽ weçxana jxpa'gaki'g txã'wẽ yajxna miipa'ga.

<sup>18</sup> Idxa's ãhmée wá' yuu, meeçxa' yuulwáana aç'a adxna yuula's pẽyine'ga.

<sup>19</sup> Yuula's dukhe'nja jĩna Pablo adx kuseju fxi'jni's uyçxa', wejx yuuwa adx txã'wẽ Pablo's yuulthu ew yũupa'ga sũjune'ga.

<sup>20</sup> Yakhthẽ'j, txã'wẽ adx neewe'weni's kxtey meen yuu, Onesimo's jxpa'gana Dxusa's jiisa na'wẽ. Txã'wẽ yũuçxa', adx ũuste wẽtwẽt kaayaki'jine'ga.

<sup>21</sup> Txã'jĩnath fxi'ja'. Idxa' kxtey yuune'ga sa' adx jxthãasnite jxthaakwe ew yũuwa'ja's jiicxath txã'jĩ'.

<sup>22</sup> Txã'wẽçxáa yũumée, adx pa'jwa'ja'swa ũythasna mes. I'kwe'sx txã'wẽ Dxus yakh puutx we'wena ũste', Dxusa' kajawáana aç'a maa enteya' sxawedu'nja i'kwe'sxtxi thegya'.

*Yuwe weçxaa kaahnitx pta'sxna fxi'jni*

<sup>23</sup> Kristo Jesusna selpiipa'ga karcelte adx yakh pi'kxna ũssa Epafxraswa yuwe weçxaa kaja'k,

<sup>24</sup> vxite' Markos, Aristarko, Demas, Lukas txãawe'sxwa mjii pu'çxsata' sa' weçxaa kaja'tx.

<sup>25</sup> Kwe'sxtxi jxpe'jsa Jesukristo' i'kwe'sxtxi pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

06da09f4-8d0f-5001-ae8c-0e6aa0131ffd